

近代中國史料叢刊第七十一輯

沈雲龍主編

李文忠公（鴻章）事略

吳汝綸撰

文海出版社有限公司印行

李文忠公事畧

李文忠公

事畧

汝綸題



序

李文忠公薨後。門下士慮各行省。請建專祠。不得公事實。屬汝綸代撰事略。分寄各省。以備採擇。其後各省皆自別撰。考核加詳備。拙稿不足復存。今來日本。兒子自行篋檢出付印。念文忠事蹟。關國家掌故。又海內外所願共聞見也。聽其印行。爲識其緣起如此。壬寅九月吳汝綸記。

李文忠公事略

護理直督周玉山方伯奏李文忠事跡疏

奏爲臚陳故督臣忠勤功績恭摺仰祈聖鑒事竊臣伏讀九月二十七日 上諭朕欽奉 慈禧端佑康頤昭豫莊誠壽恭欽獻崇熙皇太后懿旨大學士一等肅毅伯直隸總督李鴻章器識淵深才猷宏遠由翰林倡率淮軍戡平髮捻諸匪厥功甚偉朝廷特沛殊恩晉封伯爵翊贊綸扉復命總督直隸兼充北洋大臣匡濟艱難輯和中外老成謀國具有深衷去年京師之變特派該大學士爲全權大臣與各國使臣妥定和約悉合機宜方冀大局全定榮膺懋賞遽聞溘逝震悼良深李鴻章著先行加恩照大學士例賜卹賞給陀羅經被派恭親

王溥偉帶領侍衛十員前往奠醊。予諡文忠。追贈太傅。晉封一等侯爵。入祀賢良祠。以示篤念蓋臣至意其餘飾終之典再行降旨欽此。續奉本月初三日

上諭。朕欽奉 慈禧端佑康頤昭豫莊誠壽恭欽獻崇熙皇太后懿旨。大學士直隸總督李鴻章。以儒臣起家軍旅。早膺疆寄。晉贊綸扉。輔佐中興。削平大難。嗣在北洋三十餘年。辦理交涉。悉協機宜。上年京師之變。事機萬緊。該大學士忠誠堅忍。力任其難。宗社復安。朝野攸賴。本年七月間。因病迭經降旨慰問。該大學士仍力疾從公。未敢休息。忠靖之忱。老而彌篤。方冀調理就痊。長資倚任。乃驟患咯血。遽至不起。當茲時局艱難。失此柱石重臣。曷勝愴慟。前已加恩賜卹。予諡文忠。追贈太傅。晉封一等侯爵。入祀賢良祠。茲再賞銀五千兩治喪。由

戶部給發原籍及立功省分建立專祠并將生平戰功政蹟宣付國史館立傳靈樞回籍之時著沿途地方官妥爲照料任內一切處分悉予開復應得卹典該衙門察例具奏伊子刑部員外郎李經述著賞給四品京堂承襲一等侯爵毋庸帶領引見工部員外郎李經邁賞五品京堂記名道李經芳俟服闋後以道員遇缺簡放伊孫戶部員外郎李國杰以郎中即補李國燕李國煦均以員外郎分部行走李國熊李國燾均賞給舉人准其一體會試以示篤念蓋臣有加無己之至意欽此仰見聖恩稠疊賞延于世臣等同聲感激諭旨飭將生平戰功政績宣付史館立傳微臣自同治元年隨李鴻章治軍上海迄今茲親視易簣始終四十年相從最久見聞較確敬爲我皇太后皇上據實

上陳李鴻章自少受業曾國藩之門。由翰林起家。咸豐三年奉旨隨同工部侍郎呂賢基辦理安徽團防。及江忠源巡撫安徽。曾國藩貽書忠源。稱李鴻章能辦大事。其後崎嶇兵間。無可藉手。經曾國藩奏請留營襄辦。受朝廷特達之知。由福建延建邵遺缺道。超授江蘇巡撫。是時江浙淪陷。李鴻章新集八千人。起上海一隅。羸形銳進。所向無前。克復蘇州。肅清全省。遂出境攻拔嘉興。協剿湖州。扼守高溧。爲金陵聲援。使全功速成。膺一等肅毅伯之封。未幾曾國藩督兵剿捻。賴李鴻章籌餉後路。署理兩江總督。不以原籍安徽爲嫌。其時曾國藩所用湘軍。凱撤畧盡。李鴻章盡發所部淮軍。隨從征剿。一面遣部將潘鼎新率偏師航海赴津。建瓴南下。近畿恃以無恐。及受命督師。與曾國藩更出遞入。

兵事餉事。聯爲一家。又始終堅持防守運河制賊飄突之策。卒使任賴授首。東捻肅清。未幾西捻東竄。震驚畿輔。於是羣帥彙集。號令紛歧。詔書責望益切。李鴻章馳驅角逐。逼賊東趨。仍主防運圈制之策。殲賊於徒駭黃運之交。張總愚兵敗投水。西捻肅清。遂拜協辦大學士之命。凡李鴻章平定江蘇剿辦東西二捻其戰功具見。欽定方畧大要如此。初起上海時。曾國藩以謂自古東南用兵。鎮江爲必爭之地。上海孤軍難立。誠令駐軍鎮江。詔旨亦屢以爲言。李鴻章則謂海上餉源所出。已軍又上海所請。不可背棄。以孤衆望。軍固有遙爲聲勢。置之死地而後生者。卒從上海逆入。雖有君師之命。而不敢苟同也。及剿捻防運。至主客異議。終持不變。以有成功。曾國藩陳奏平捻之功。推李鴻

章之定謀。以此國藩平日最稱李鴻章有大才。言未見古來英雄。見胡林翼李鴻章。意古英雄不過如此。然猶以李鴻章未遇逆境爲疑。及見其剿辦西捻。迭奉嚴旨。而夷然順受。果毅不撓。於是又歎其進德之猛。其師友相策勵。大率類是。自中原罷兵。李鴻章始赴楚督本任。已而援黔未行。援陝未久。而卒移督直隸。兼辦海防。自是以大學士坐鎮畿輔。辦理內政外交。以一身繫天下安危者卅餘年。其內政分民事兵備財政爲三端。民事如辦理河工。每歲籌款數十萬。賑救災民。每歲籌款數十萬。皆前此直督所未有。李鴻章行之三十年如一日。賑災則兼顧山西河南。治河則兼籌河南山東。不分畛域。不辭勞瘁。微臣皆曾參與其間。目所親見。同治十二年。京察諭旨。稱其盡心民事。殆無媿詞。兵

備則全師西法。自在上海。所部各營。即令練習西器。設局製造軍火。及至天津。愈益拓充。又開辦水師武備管輪電報各學堂。他省立法。多取師於津郡。又修築旅順威海臺壘船澳。西人過者。輒指目以相驚詫。其苦心經營。尤在海軍。當時餉項支絀。李鴻章逐年節縮。購備鐵甲二艘。軍將駛至日本。日本人相驚失色也。海軍之立。醇賢親王手記其事。謂將漸次推廣。始克成軍。微臣與定章程。具聞。閔議。賢王殂謝。壯圖中輟。海軍既尙未成。陸軍雖習西器。而學堂未廣。將弁無學。止可彈壓內匪。不足驟當大敵。李鴻章歷年奏牘。固屢言之。恭忠親王醇賢親王先後當國。皆推誠相與。倚信不疑。國是賴以堅定。甲午之役。論者以李鴻章主和爲非。攘臂言戰。遂至國勢動搖。而所育之人才。所扼之地勢。所備

之利器均付一擲。此最李鴻章所腐心切齒者也。前卅年皆倚信之而安。一不信而危。其於兵謀利鈍。卓有遠見如此。至其經畫財政。則興辦招商輪船。以挽中國已失之利。開探唐山煤井。以覓自古未興之利。近築津榆鐵路。遠開漠河金礦。電線遍乎行省。紗廠燬而又興。凡皆時論所譏排。而國收久遠之利。以上三端。皆李鴻章內治之彰較者也。其外交之策。則尤擅專長。而辦理外交亦最久。同治十年。日本初議通商。十二年。議秘魯招工。光緒二年。烟臺定約。六年。巴西通商。二十一年。馬關議和。此次聯軍定盟。凡爲全權者六。皆獨力主持。同治三年。派兵防禦臺灣。光緒六年。伊犁爭界改約。八年。朝鮮定亂。九年。法越肇釁。廿年。日本敗盟。凡外交而涉兵端者五。皆艱難定議。綜計甲午以前。數十年來。

中外一有嫌隙。經李鴻章維持其際。無不立爲解釋。由此各國推重。五洲辦外交與李鴻章齊名者。不能三數人。往時美國舊民主格蘭忒。遍遊歐亞。謂天下賢相三人。其一德國畢士馬克。其一英國格蘭斯登。其一則中國李鴻章也。馬關和定。未幾奉命使俄。遂歷聘德法英美。所至君相。無不尊崇加禮。國人以一見爲榮。其至德國。德人并其君。同爲塑像。德君爲立像。李鴻章爲坐像。其敬愛如此。緣李鴻章管事既久。外國婦孺。無不知其姓名。以此國威新挫。而邦交益固。凡此皆李鴻章外交之彰較者也。歷聘歸朝。遂入譯署。合署章京。喜得師法。已又命勘黃河。命爲商務大臣。命督兩廣。蓋朝廷知李鴻章年近八旬。而神明強固。大疑大計。一於李鴻章決之。及去年之變。有詔召入京師。

行至上海。而道阻不能前進。北禍益急。聯軍大集。兩宮倉卒蒙塵。天下望李鴻章如大旱望雨。朝廷亦有旋乾轉坤之諭。逮李鴻章既入敵軍。通國皆隱然有恃。由是千磨百折。卒定和議。遠方聞者。或未盡滿意。而李鴻章實已心肝崩碎。遂至一疾不起。各國公使及水陸兵官來弔唁者四十餘人。同聲致詞。皆云數月前議約。該大臣所爲。皆他人不能爲之事。足見外國具有公論。伏查李鴻章爲曾國藩入室弟子。其謀國忠誠。決策英斷。不搖浮議。不顧毀譽。兩人亦略相倫等。其任事勇銳。赴機捷速。不爲小廉曲讓。則李鴻章有獨至孤詣。至其外交之學。曾國藩有未逮也。自少至老。歷常變夷險。未嘗一日言退。雖間嬰疾病。不輕乞假。嘗言曾國藩晚年求退。爲無益之請。受國大任。死而後已。朝廷